



## Le ciconia in le agro

Un estate, quando le cereal stava alte al agro, le molbos habeva le visita de un ciconia.

Illo se habeva facite le mal costume de ambular de un latere al altere sur le agro pro capturar ranas. E isto esseva un cosa seriose, nam le molbos habeva grande timor que illo fullarea tote le cereal del agro.

Illes discuteva longemente como chassar lo via.

Al fin illes esseva de accordo que le pastor debeva ir inter le cereal e expeller le ciconia.


Ma justo quando ille esseva preste a entrar inter le cereal, le molbos discoperiva que le pastor habeva grande pedes large. E allora illes habeva timor que ille fullarea plus de cereal que le ciconia.

Que facer ora? – Finalmente un de illes habeva un bon idea. Iste molbo proponeva que on deberea portar le pastor inter le cereal, allora ille non poterea fullar le cereal.


Isto esseva un bon consilio, omnes pensava. Pro isto illes iva pro remover le barriera de entrata al agro. Illes placiava le pastor sur illo. E allora octo homines le portava inter le cereal a fin que ille poteva chassar le ciconia via.

In iste maniera le pastor non del toto fullava cereal con su grande pedes.

## VOCABULARIO



**ambular** vader, ir – **capturar** prender  
– **haber timor** esser nervose – **fullar**  
facer platte per vader sur illo –  
**expeller** remover – **barriera** le porta al  
agro – **non del toto** absolutamente non



■ Mols es un parte geographic del peninsula danese Jutlandia. Mols es ric de collianas. Le habitantes de Mols es appellate *molbos* e es considerate un poco stupide per le daneses. Assi existe multe historias del molbos.

## QUESTIONES AL HISTORIA

Quando es il estate?	Que es le problema?
Ubi trova on le cereal?	Que es le solution?
Quante typos de cereal ha il?	Como entra le molbos al agro?
Proque captura ciconias ranas?	Ubi es le pastor?
Proque ha le molbos timor?	Quante molbos porta le pastor?
Qui ha un idea?	Que occorre con le ciconia?
Que es su proposition?	